



Ta chê di Svualt nol oreve propit lâ cun chei altris pensionâts a visitâ il museu di Van Gogh. Al jere zaromai il cuint di di chê gjite in Olande organizade dal Dopolavôr; cualchi sere prime al veve parfin scugnût sopuartâ un noiôs riceviment inmaneât des autoritâts di Schiedam, citât zimulade cun Udin. Insome, in chel dopomisdì di fumate lui al rivà di bessôl tal quartîr a lûs rossis di Amsterdam. No lontan de vecje catedrâl si fermà intune edicule-tabachin par cjoli un pacut di J.P.S. Il gjestôr cinês dal ambient nol vendeve dome il TIMES, LE MONDE o il (o la) FRANKFURTER ALLGEMEINE ma ancje une valanghe di giornâi e dvd porno e su lis scansiis... veju li, ben in mostre, i pacuts des meraculosis pirulis celestis! Svualt al domandà ancje un di chei.

No si sa mai” al pensà.

Insome, jessût fûr de butegute, no i restave che sielzi la frute. Daûr des tendis rossis al jere plen di signorinis in short e perizome che i cimiavin.

Dopo vê un pôc zirât al sielzè une un pôc in cjar che i sameave sudamerecane.

Cuistion di un vincj-vincjecinc minûts e di un cincuantin e podopo il nestri al torne fûr sodisfat. Dongje de puarte dal cabôt des tendis rossis, velu li, une sorte di magnaccia cu la piel ulivastre, plen di cjadenis di aur e cuntun dogo argjentin peât a la cuarde... cjan e paron

a samein fâ come di sentinele.

Bon, alore Svualt cumò al à voie di provâ une altre emozion: al note la insegne di un COFFEE SHOP... i ven il desideri di fumâ la droghe e cussì si indrece intune androne.

No, Svualt, dulà vâstu? Mai isolâsi ta chês zonis di Amsterdam; no ti vevin visât? Di bot cuatri neris lu circondin; doi di lôr a son armâts di luncs curtis. A àn voie di freâi i bêçs de pension!

Even fûr une barufe. Lui al da pugns e pidadis e panzadis ma prest si cjate a tiere, derobât e intun lâc di sanc.

Cualchi ore dopo al è intun jet di ospedâl. Dongje di lui a son i amîs de coriere dal Dopolavôr ma anche chel lofion sudamerican plen di cjadenis di aur che al faseve la vuardie fûr dal casin: propit lui al jere vignût a socori Svualt, prime che al fos masse tart.

«Checo, o crodevi che tu lu fasessis murî chest puar Svualt!»

«No... mi à fat masse dûl, lu ai lassât vivi... in ogni câs, crodeitmi, se o vais là sù... miôr viodi Van Gogh!»

**di Checo Tam**

**#175**